



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8 Yangia anidakangma : Tir Yimyim tir_yimyim

tir yimyim TAPAK 8

India-i BIMSTEC den tesendaktep tashi itshtitsü: S Jaishankar

West Indies nunger asayar Bravo asaya nungi anenogo

VOL. XXI ISSUE NO. 347 (ADOK 347) DIMAPUR AMUNGNÜ (SUNDAY) RONGJUI (SEPTEMBER) 29, 2024 ₹ 5.00

PS Committee nung MP Supongmeren shim

Dimapur, September 28, 2024 (TYO): 2024-25 atema Parliamentary Standing Committee on Communications and Information Technology nung züngsem shimba atema Nagaland MP (LS) S. Supongmeren Jamir nem tenüngsang agütsür ta Nagaland Pradesh Congress Committee (NPCC)-i metetdaksü.

asera pai Nagaland nung alirtem yaritsü tenangzükba yur mapa tajung inyaka arur. Pa MP ka ama shimba sülen nübertem ajungketsü atema mapa balala inyaka arudar ta NPCC-i ashi. Pai dak aketba sempet aser pai bendanga agüja inyakba ajanga Parliamentary Standing Committee maparen nung teyari tulu angutsü aser iba ajanga Nagaland state ajangzüksü, ta NPCC-isa ashi.

Opioid Substitute Therapy atema sentong agi

Kohima, September 28, 2024 (TYO): Nagaland nütsüng yongsük nung opioid drug users 6.5% shi atema Honibarnü consultation workshop ka agiogo.

liasi. Iba jagi opioid users-i OST kübok adentsü atema osang prokshitsüla" ta Renbonthung-i ashi.

Nagaland nung opioid drug users lakh 1.3 shi lir aser Opioid Substitute Therapy (OST) nung parnok talila anioxtsü atema iba sentong agi.

"OST ya 2006 küm tenzük aser Injecting drug users rongnung HIV tebilemtsü azüoktsü atema iba ya tenzük" ta Nagaland Drugs and AIDS Organisation Secretary Ketho Angami-i ashi.

Iba sentong ya Nagaland Users' Network aser NNagaDAO ajanga ayongzük aser NSACS, PATH, CDC, PERFAR & CAD Foundation ajanga teyari agütsü.

NGO-i Kohima, Dimapur aser Phek district tem nung tesem pezü lapok aser OST ajanga injecting aser opioid overdose cases ajema kümdaktsüogo, ta pai ashi.

"Nagaland nung tang OST kübok nisung 9499 lir aser parnok regular OST centers 32 nung teyari angur. NGO temi OST center 5 ketdangsüa repranger aser tanüngba 27 ji sorkari repranger" ta Nagaland Users Network nung Technical advisor Renbonthung-i ashi.

2009 küm National AIDS Control Organisation (NACO)-i OST centers aniok aser India nung district ajak nung OST lapoka alibaji Nagaland state dang lir, ta Ketho-i ashi.

"2019 küm Ministry of Social Justice & Empowerment, Government of India ajanga Nagaland nung arishi küm 18-50 tsüngda alir nisung 1,30,000 shi opioid users lir ta sangdonga

"OST ya medically supervised treatment ka lir aser heroin amala opioids melena buprenorphine amala mozütem agüja yarir" ta OST Centre, Naga Hospital Authority Kohima nung OST, Medical Officer-i ashi.

Shillong nung lokti adenshtitsü memelar

Shillong, September 28, 2024 (Agencies): Meghalaya sorkari Urban Agglomeration area dena Shillong city telongtet nung nisung pungu mesüra tema rally mesüra procession magitsü tenokdangba agütsüogo.

tetuyuba agütsü. "Iba ama rally ajanga Shillong aser East Khasi Hills District nung tensa mejungi akümtsü akok" ta District Magistrate-i ashi.

Iba tetuyuba ya East Khasi Hills district District Magistrate R. M. Kurbah-i agütsü. October 2 nü telok kari Shillong nung Gau Dhvaj Sthapana Bharat Yatra ayongzüksü sentong atongba mapang ka nung sorkari iba tenokdangba agütsüogo.

Swami Avimukteshwaranand indang chartered flight noktang: Agartala nung airport authority-i September 28 nü Jagadguru Shankaracharya Swami Shri Avimukteshwaranand Saraswati indang chartered flight Shillong-i meyoki noktang.

Yatra ayongtertemi sentong agütsü atema jelia temelaba memeshi ta district ketdangsürtemi ashir.

Yatra lennirtem ya chartered flight ka nung senzür aser parnok Agartala Airport nung lia Shillong-i arutsü temelaba magütsü. APD (Air Passenger Duty)-i Shillong Airport ketdangsürtem dang nungi temelaba mangu.

Khasi Students' Union (KSU), Hynniewtrep Youth Council (HYC) aser Hynniewtrep Integrated Territorial Organisation (HIITO)-i Gau Dhvaj Sthapana Bharat Yatra tanishirtem Shillong semdangba magizükba metetdaksüba sülen district ketdangsürtemi iba

Iba ajanga Yatra lennirtem Shillong-i aotsüba sentong athi aser tanü nikongdang 3:00 ako meta Guwahati tongogo.

Arunachal MP Tapir Gao-i Lao-ong Mo benjung nung aden



Arunachal East Constituency nungi Lok Sabha MP Tapir Gao aser pa kinungtsü nati Local Ground, Mon nung Lao-Ong Mo benjung nung shilem agiba angur.

Dimapur, September 28, 2024 (TYO): Konyak nunger sobaliba benjung Lao-ong Mo nung Arunachal East Constituency nungi Lok Sabha MP Tapir Gao-i shilem agiogo.

Arunachal MP Gao-i tsüngtsüng tema benjung lapoktsü.

September 28, 2024 nü Local Ground, Mon nung benjung amongdang Tapir Gao-i tetushi süa jaoker ka ama shilem agia liasi.

Iba sentong nung Tapir Gao den pa kinungtsü aser MP (Rajya Sabha) Phangnon Konyak, Advisor W. Chingang Konyak aser MLA Manpon Konyak nunger aden.

Tanü yartsüngsangertemi pa pelaa agizük aser Totok Union-i süngkong atem. Iba sülen

Tapir Gao-i Konyak nunger dang pelaba metetdaksü aser maneni sobaliba senmang wazüka ayutsü ayongzük.

tongtipang lir aser asen loktiliba nung drugs khuret samatsütsüla. Asenoki sorkar ketdangsürtem aser police dak dang metaloker malitsüla" ta pai ashi.

Iba sentong nung Konyak Union President Tingtok Konyak-i tesentepertem pelaa agizük, Wakching KU Unit-i "Kongkih lahha vÜnglak" ta ser sobaliba ken ka aten aser Wanshi Phongnyu-i Lao-ong Mo osang tatsüka lemsatop.

"Asenok taküm nung health aser education ya kanga

GPRN/NSCN (Kitovi) nung züngsem 170-i tezüngzüktep agiogo

Dimapur, September 28, 2024 (TYO): N. Kitovi Zhimomi-i aniba GPRN/NSCN nung September 28, 2024 nü tanabuba tezüngzüktep agiba sentong ka agiogo.

National Movement nung aden aser parnok taküm bendanga agütsüogo" ta Ato Kilonser N. Kitovi Zhimomi-i o jembidang ashi.

Iba sentong nung Kilonser, Deputy-Kilonser aser Tatar dena züngsem 170-i shilem agia liasi. Sentong nung Kilonser Kilo Affairs Hukavi Yephthomi-i züngsem tasentem pelaa agizük aser Secretary N.T.H Nzanthung Lotha-i party discipline zünga metetdaksü ta Secretary MIP-i sangdong ka nung ashi.

Nisung tepsetba ajanga nükjidong metongtettsü saka yimtem olemtep aliba ajanga dang khurettem koktettsü ta angateta GPRN/NSCN-i India sorkar den Cease Fire alitsü lemtet. Iba sülen olemtepa arur November 17, 2017 nü India sorkar o WC, NNPGs tsüngda 'Agreed Position' nung sign sütepa aser October 31, 2019 nü olemtep tembang ta Kitovi-i ashi.

"Agreed Position ya kanga tongtipang lir aser iba ajanga lanu putu tarutsü nung kongshitsü. May 16, 1951 nü Plebiscite agiba sülen nisung meyrjang aikati

GPRN/NSCN President R.M Lotha-ia tezüngzüktep agir ajaki yimya tajung bentshitsü aser

Naga yimten tebilemtsü atema bilema tekaratiba nung latettsü atema yariteptsü ayongzük.

"India sorkari angatettepa aliba onüktem nungi meyipa ora cease fire masüdag aliba tensa ajurutsü. Kanga meranga yimjung nguteta alibaji samara GPRN/NSCN-i tebilemtsü khuret mabentsü" ta R.M Lotha-isa ashi.

Tanü sentong nung Speaker N.T.H Ebibemo Lotha-i tezüngzüktep agidaktsü aser Nochotole Yosa Chaplin (Tatar)-i tenüngsang agüja sarasadem.

Sentong nung mendenji Chief Secretary GPRN/NSCN Achumthang Lotha liasi aser MRA Kilonser Hokiye Awomi-i temoatsü meshia sarasadem.

NPCC-i Gau Dhvaj aitsür; Senso temeten kümzüka ayutsü

Dimapur, September 28, 2024 (TYO): Nisung aser sobaliba temeyoktep aliba aser kati ka libaliro akhümtsübutepba nung India democracy amendaka lir ta Nagaland Pradesh Congress Committee (NPCC)-i metetdaksü.

teyari agüja inyaker ta Communications Department, NPCC-i ashi.

Ajisüaka, tawa India tamendakdak raksatsütsü merangba mapa aika inyakba angur aser iba atema temulung raksar. Talisa iba mapa ya sorkari

September 28, 2024 nü Kohima nung "Gau Dhvaj Sthapana Bharat Yatra" ta ser nashi tepsetba noktangtsüba sentong ka agütsü renembaji iba telemsa adokdaksüba inyakyim nung "Exhibit A" lir ta NPCC-isa metetdaksü.

lir aser nisung ka temeten nung tongtipang shilem ka lir. Nagaland nung tashiyim agi achiajamba yimya mesüra tamangba yimsü benoktsü merangra onoki tatem tashi anema noktaksü, ta parnokisa ashi.

Linük ajungalen onoki sobaliba, inyaksangshi aser kin ajak maittsü akhümtsübur aser kümzüka ayutsü nangzükshir ta NPCC-isa ashi.

NPCC-i iba Gau Dhvaj aitsür aser chiyungtsü ya nija mulung

CPO Hall Chumoukedima nung seminar ka agi D Block nung Swachhata Hi Seva campaign ayongzüka agi



CPO tenteter kum 150 ajungba nungdem nung seminar ayongzüka agiba noksa nung angur.

Dimapur, Rongjui/September 28 (TYO): Chakhroma Public Organisation (CPO) tenteter kum 150 ajungba nungdem nung CPO Hall Chumoukedima nung anogo ka atema seminar ka ayongzüka agiogo.

Honibarnü iba seminar nung Advisor, Urban Development & Municipal Affairs, Zaleo Rio alakteta jaoker liasü.

Sentong nung o jembiba mapang Zaleo-i, taoba mapang Dimapur lenden lima aser iba adena orr aliba tesemtem Chakhroma Angami nungertemi amokbanger liasü, Tangbo lenden lima nung Naga nunger yimtsügem aika amenokogo, ta ashi. Paisa, CPO aser Western Sumi Hoho na teka ama litepa inyaksangba atema pelaba lemsatop aser iba ajanga Naga nunger yongtsung nung yimjung nung aliba tatishtsü tajung sayur ta ashi.

Paisa, Chumoukedima ya Dimapur district headquarters sür tenteta liasü, saka kuli balala ajanga inyaksangshi mesütet, ta ashi. Rio-i ashiba agi, Chümoukedima district ya administration tajungba aser tayongba akümtsü atema tentetba lir aser iba district tentetba atema tanga tebilemba kecha malitsüla.

Kasa mapang nung Deputy Commissioner, Chumoukedima Polan John-i ashiba agi, tarutsü yanglushiba nung CPO-i tongtibang shilem agitsü aser temelenshi tajung aser telungjem adokdaksütsü atema CPO shilem ya kanga tongtibang asütsü, ta ashi.

Sentong nungsa Commissioner of Police, Dimapur Kevithuto Sophie-i, tang education system benoka aliba ya melenshia skill based curriculum tem dak rangloker inyaksü nungdaker, ta ashi. Paisa,

lanurtem dang sorkar mapa dak dang memetaloki vocational training agitsü aser mapa angutsü atema lenmangtem bushitsü ajungshia liasü.

Maneni Senior Advocate Guwahati High Court Kohima Bench & President, High Court Bar Association, Kohima, Advocate C.T Jamir-i, Legal Rights & Responsibilities indang jembiba mapang, ajaki asen temeden indang jangja alitsüla aser tongtibangsa asen khuret angatetsüla, ta ashiba den Naga nungerteri khuretem dakbo tali merangloker ta ashi.

Pai ashiba agi, CPO kübok aliba tesemtem ya kanga tongtibang tesem nung amenoka lir aser terenlok asoshi lenmang sadema lapoka lir, anungji nüburtemi temzüng ozüng kübok pei temeden aser khuret meteta alitsü tim, aser tarutsü putu atema sentong tajung yanglutsüla, ta C.T Jamir-isa shisem.

Kohima, Rongjui/September 28 (TYO): Kohima Municipal Council den longjemer D Block Ward No. 6-i ayongzüka Honibarnü Swachh Bharat Mission (Urban) Swachhata Hi Seva campaign takok ngua agiogo.

Iba sentong ya merekmeju, tüzümpung wazüka ayutsüba dak rangloker agi, kong lokti merekmeju aser süngtong atemba amala agongzüka agia liasü.

Sentong asoshi longjemer inyaktertem rongnung 13 Assam Rifles asder Government Primary School, D Block densema liasü.

Kohima Municipal Council Councillor and Sanitation and Water Supply Convenor

Thenusou Sekhose-i o tatsüka jembiba mapang merekmeju alitsü atema peisasa khuret angatetsü aser merekmeju yimya tajung beshitsü koda

tongtibang iba indang lemsatop. "Merekmeju ya ajak indang mapa lir," ta lai ashi.

Sentong ayongzüka agiba mapang ward telongtet nung Cleanliness Target Unit (CTU) tem merektetogo.

Ward kübok sector balala nungi volunteers temi kiyong mereka ayutsü atema shilem tajung agia liasü.

Meremmeju sentong den repsema iba sentong nung shilem agirtemi CTU tem anasa süngtongtem temtsü. Kiyong nung alirtem, military personnel tem aser kaketshirtem longjemer inyakba ajanga arok nükjidong atalokba aser telungjem tashi jungkai adokdaksür.

Sentong nung D Block Ward No. 6 Sanitation Committee Convenor Neisavotuo Whuorie-i lokti pelaagizükba o jembia liasü.

Kohima Village PHC nung Ayushman Bharat Health Check-Up Camp agiogo



Kohima Village Primary Health Centre (PHC) nung September 28 nü Ayushman Bharat Health Check-Up Camp ayongzüka agiba mapang tangokba noksa nung angur.

Dimapur, Rongjui/September 28 (TYO): Office of the Chief Medical Officer, Kohima den District Implementation Unit (DIU) AB-PMJAY aser empanelled hospitals tem ajak longjemer September 28 nü Kohima Village Primary Health Centre (PHC) nung Ayushman Bharat Health Check-Up Camp ka agiogo.

Iba sentong ya 6buba Ayushman Bharat Pradhan Mantri Jan Arogya Yojana (AB-PMJAY) amungba mapang AYUSHMAN PAKHWADA nung shilem ka ama agiogo.

Sentong nung Deputy Chief Medical Officer Dr. Imchatoshi-i, AB-PMJAY indang 6buba Anniversary indang metetdakwa liasü. Pai, beneficiariy ajak dang scheme ajanga agütsüba healthcare service ajak takok tashi agitsü ajungshia liasü.

Sentong nungsa Kohima Village PHC tenung nung Meselhoulie Rame-i o tatsüka jembiba mapang iba inyakyim asoshi lokti teyari kodang tongtibang iba indang lemsatopa liasü.

Kasa mapang nung Village Chairman aser tanga lenirtemia iba camp nung shilem agi, Camp mapang health check-ups, non-communicable disease (NCD) diabetes aser hypertension screenings, obstetrics aser gynecology, ophthalmology, dental procedures, AYUSH consultations, aser AB-PMJAY/CMHIS schemes nung züngoksemba amala sentong balala ayongzüka agiogo.

Kohima nung AB-PMJAY indang Nodal Officer Dr. Imchatoshi-i anir district team-i iba camp ya achaayanga liasü. Ajak senteper beneficiary 58 iba camp ajanga ajangzükogo.

Lotha Officers Association inti senden menogo



September 28 nü LOA züngsemtem den alakteta jaoker aser o jembirtem Angh Hall, Agri Expo nung LOA conference agiba mapang tangokba noksa nung angur.

Dimapur, Rongjui/September 28 (TYO): Lotha Officers Association (LOA) annual conference den repsema telungjem sentong September 28 nü Angh Hall, Agri Expo 4th mile Chumoukedima nung agiogo.

Principal Secretary, Government of Nagaland, E.M Patton, IA & AS shiba iba sentong nung alakteta jaoker liasü, pai office tem dang tangar kodanga luja mebilemtsü ajungshi. "Na temaba jenjang tongteta lir ta ser tangar nemja tebilem, kechiyong service career ya kodangang kechi asüjar memetet," ta pai ashi.

Paisa, parnok dang meranga inyaksü, Tulusang Tsüngrem dang sarasademtsü aser tamang akatsü ajungshia liasü. Tesendaktep aser networking koda tongtibang iba indang jembiba mapang pai tesendaktep aser networking tajung yanglua ayuba ya investment tajung lir ta ashi.

Iba anogo alakteta jaokeri

LOAs history booklet 2buba edition sayaja liasü.

Kasa mapang nung Dr. M.L Ngullie (Retd Principal)-i tajungshi o tatsüka jembia liasü. pai office tem dang tebilemdangba tasen benoka inyaksangshitsü ajungshi. Maneni pai, alima melenshia aoba den liromedema aintsü atema maneni update süa alitsü ajungshia liasü.

Sentong nung Er. N.Izamo Yanthan, Superintending Engineer AIR & DD (CCW) Kolkata-ia o tatsüka jembia aser office tem dang parnok mapa ata aliba tesemtem nung temelenshi bener arutsür kaka akümtsü ajungshia liasü.

Sentong nungsa Nongothung Jungio (IRS) Director of Income tax, Ministry of Finance, Government of India-ia o tatsükajembia liasü.

Maneni Additional DGP (Admn) Nagaland, Renchamo P. Kikon, IPS-i, officer tem dang

parnok mapa ajanga lokti ajangzüksü atema teyari agütsür magütsür aji lepa reprangshitsü ayongzüka liasü.

Iba sentong nung LOA tir K. Libanlung Lotha IAS-i lokti pela agizükba o jembia aser pai, Lotha officers temi teka amteper inyakba atema kanga pelaba lemsatopa liasü.

Sentong nung Rev. Limhathung Lotha, Pastor Lotha Baptist Church Diphupar-i Tsüngrem temoatsü meshizüka sarasadem aser asürtem bilemteta aküm tetushi agütsüba mapang tatsüka agia liasü.

Tanga sentongtem rongnung Thunglamo Ngullue, Eyilobeni Kikon, Emilio Patton nungeri shilem balala agiba densema lir.

Vice President LOA, Kyopenthung Tsopoe-i tepela o jembia aser Fr.Philip Yanpvuthung, Principal, Holy Cross Hr.Secondary school Dimapur-i sarasademer iba sentong tembanga liasü.



September 28, 2024 nü Tamil Nadu kübok Hosur nung Tata Electronics Pvt Ltd indang electronics component factory nung mi adoka chemical godown ka arongba noksa nung angur.

India-i BIMSTEC den tesendaktep tashi itshitsü: S Jaishankar

New York, Rongjui/ September 28 (Agencies): India External Affairs Minister, S Jaishankar-i, India nunger Neighbourhood First aser Act East Policy mapatongtem den sendaktepa India-i linük teneti tentetba BIMSTEC tentet dan tesendaktep tashi itshitsü, ta metetdaksü.

Jaishankar ya tang US-i oa lir. 79buba United Nations General Assembly senden nung adentsü atema pa New York-i oa lir.

UNGA senden aliba mapang nung Hokolbarnü New York nung Bay of Bengal Initiative for Multi-Sectoral Technical and Economic Cooperation (BIMSTEC) züngsem linüktem nungi Foreign Ministers tem jurila senden pa leniba nung amen.

Iba senden ya BIMSTEC lenirtem senden atema renemshiba senden ka liasü.

Jaishankar-i X ajanga, "Onoki health, chiyungtsü security, shishilembaba, investment, rongsenkettzüng aser energy sectors nung amalitepa inyakba jenjang reprangshiogo. Region tesem ajaklen physical, maritime aser digital connectivity ajungtsü atema rangloker jembiogo.

Capacity building, skill development aser nüburtem tsüngda tesendaktep tajungba akümtsü atema maongka bushia jembiogo," ta metetdaksü.

"BIMSTEC Centres of Excellence terenlok atema longjemmer inyaksü onoki bangjemogo. Neighbourhood First, Vision SAGAR aser Act East Policy nung ajemdaker India-i BIMSTEC den tesendaktep tashi itshitsü," ta paisa metetdaksü.

India nunger 'Neighbourhood First' policy dak sendakba nung India-i kidanger linük ajak den tesendaktep yanglur, koba ajanga ajak ajangzüktsü, ta pai ashi.

Security and Growth for All in the Region (SAGAR) mangdang nung ajemdaker India-i tziyim nunga regional partners den amalitepa inyaker, ta pai metetdaksü.

India nunger Act East Policy ya Indo-Pacific region nung aliba linüktem den rongsenkettzüng, sobaliba aser asalentong tsütsü tesendaktep tashi itshitsü atema benokba mapatong ka lir.

BIMSTEC nung züngsem linüktemji India, Bhutan, Bangladesh, Myanmar, Thailand, Nepal aser Sri Lanka

linüktem lir. Iba dak alia Jaishankar aser Dominica Minister for Foreign Affairs, Vince Henderson na leniba nung India-CARICOM Foreign Minister tem senden-a menogo.

CARICOM nung züngsem 15 ji Antigua & Barbuda, Bahamas, Barbados, Belize, Dominica, Grenada, Guyana, Haiti, Jamaica, Monsterrat, St. Kitts & Nevis, St Lucia, St. Vincent & Grenadines, Suriname aser Trinidad & Tobago lir.

Tesülen Jaishankar-i X ajanga, "Partnership tajungba akümtsü aser health, Information Technology, FinTech, capacity building, renewables aser chiyungtsü security tsütsü taliba amalitepa inyaksü atema jembiogo," ta metetdaksü.

Jaishankar aser Honduras Foreign Minister, Enrique Reina na leniba nung India-CELAC Foreign Minister tem senden-a amen.

Community of Latin American & Caribbean States (CELAC) ya intergovernmental organisation ka lir aser iba tentet nung Latin America aser Caribbean nung aliba linük 33 lir.



September 28, 2024 nü Kulgam district kübok Adigam yimdak kiralongrartem aser sepaitem na tsüngda raraba tesem nung sepaitem adenshia aliba noksa nung angur. Iba rara nung kiralongrar ana khaset aser sepaitem asem yiru.



NOTICE

2019-24 atema Transmission tariff asoshi petition aser determination of transmission tariff for 2024-29 tariff block for Petition-1: 132 kV S/C Ranganadi-Ziro Transmission System in the North Eastern Region.

1. Tekalen shia aliba Transmission system ajang tajangzük angurtemji- (a) Assam Power Distribution Company Limited (b) Meghalaya Energy Corporation Limited (c) Government of Arunachal Pradesh (d) Power & Electricity Department, Mizoram (f) Electricity Dept. of Puducherry (g) DOP, Nagaland aser (h) TSECL lir.

a) Tariff Block (Rs in Lakhs)

Petition no	Asset detail	DOC/ECOD/Notional	Completion Cost as on 31.03.2024	Revised AFC based on true up	2019-20	2020-21	2021-22	2022-23	2023-24
Petition -1	Combined Asset	01.04.2004	1831.13		259.43	259.68	259.74	260.35	262.09

b) 2024-29 Block (Rs in Lakhs)

Petition no	Asset detail	Completion Cost as on 31.03.2029	AFC	2024-25	2025-26	2026-27	2027-28	2028-29
Petition -1	Combined Asset	1831.13		242.58	244.54	248.37	254.09	260.01

4. Determination of tariff atema yangluba application copy ka applicant indang website nung www.powergrid.in nung agüja lir.

5. Application nung aliba determination of tariff atema proposals nung tebilemba onük mesüra tashishiba kar danga lira iba notice agütsüba anogo nungi tenzüka anogo 30 tsüngda beneficiary densema nisung mashie kati Secretary, Central Electricity Regulatory Commission, 6th, 7th & 8th floor, Tower B, World Trade Centre, Naoraji Nagar, New Delhi 110029 (mesüra Commission indang office aliba address) nem metetdaksütsü akok, iba denji külemi corporate office indang address nung applicant nem-a copy ka agütsütsüla.

Place: Gurugram Sd/- Date: 24.09.2024 Chief General Manager (Commercial/RC)

POWER GRID CORPORATION OF INDIA LTD (A Government of India Enterprise)

Registered Office : B-9, Qutab Institutional Area, Katwaria Sarai, New Delhi 110 016 Corporate Office : "Saudamini", Plot No. 2, Sector-29, Gurugram, Haryana - 122 001 Website: www.powergrid.in, CIN: L40101DL1989GOI038121

A Maharatna PSU

Bihar nung tzümetsüng agi district 12 kübok nisung lakh 13 kongshiogo



Bihar nung ayongküm anasa aliba ki kar tzü agi metsüngbanger aliba noksa nung angur.

Patna, September 28

(Agencies): Bihar nung Ganga ayong agi kongshia aliba district 12 nung nisung lakh 13 shi tzümetsüng agi kongshiogo, ta ketdangsertemi metetdaksü.

Tzümetsüng agi kongshiba district tem rongnung Buxar, Bhojpur, Saran, Patna, Samastipur, Begusarai, Munger aser Bhagalpur densema lir.

Honibarnü Valmikinagar aser Birpur tzi-tepdang nungi tzi aika chiokba ajanga Bihar north aser central tsütsülen Kosi, Gandak aser Ganga ayongtem nung tzi kanga metsüngbanga ayimba ajanga kanga nemzüka aliba tesemtem nungbo tzümetsüng agi nisung aika kongshiogo.

Indian Meteorological Department (IMD)-ia tziunglu kanga arutsü aser ibaji ajanga district kar nung tzümetsüng lendong ataloktsü, ta metetdaksüogo.

Honibar anüngdang tashi nung Kosi ayong nung aliba Birpur tzi-tepdang nungi tzi 5.7 lakh cusecs chiok, ta state Water Resource Department nung Principal Secretary, Santosh Kumar Mall-i osangbenertem nem metetdaksü.

Paisa, ayongküm anasa alirtem kümzüksü atema mera

balala agia inyakogo, ta ashi.

Anüngdang tashi nung Valmikinagar tzi-tepdang nungia tzi 4.20 lakh cusecs chioka liasü.

"Tesüiba anogo ana-agem tziunglu maneni aruba ajanga state tesem ajaklen ayongtem nung tzi level kanga tudar. Nepal nunga tziunglu maneni aruba ajanga arrtsülen aliba district tem nung ayong aika nung tzi tali mobanga yimdar," ta ketdangser kati metetdaksü.

West Champaran, East Champaran, Sitamarhi, Sheohar, Muzaffarpur, Gopalganj, Siwan, Saran, Vaishali, Patna, Jehanabad, Madhubani aser Bhojpur district tem nung tziunglu sashia arutsüa akok, ta Hokolbarnü India Meteorological Department (IMD)-i metetdaksüogo.

Iba dak sendakba nung state disaster management department-i item district nung ketdangsertem dang kanga yakyaka alitsü aser tzümetsüng lendong nungi nüburtem kümzüksü atema mera agia inyaksü tuyuogo.

Tang tzümetsüng agi kongshia aliba district tem nung nisung teimbaka aniteta relief camps nung jenokdakja lir, ta ketdangsertemi metetdaksü.



TIR YIMYIM YIMOBILEM (EDITORIAL)

DIMAPUR AMUNGNÜ, SEPTEMBER (RONGJUI) 29, 2024

Tepela

Alima nung asen mulung nung aginüa bilemba aser asen nüki aginüa repringbatem nem asenok taküm anishidaksüra, asenok kodanga pelaa aser temulung süa malitsü. Anogo shia oset aser süoshi tasen tasen adoker aser item ajakji aka nung dang asenok jangratemaa pelashishia alitsü amai asenoki bilemer. Aji oda, asenoki aiben asenok akabatem tangar den medemdanger aser iba jagi asenok tali mepelaba kümdaktsür, kechiyong nisung tenükbo kecha agia süngdaktsütsü makoker. Atangji, alima rongsen agi angutsü merangba tepelabo melamelaa angutsü akok saka ibaji khen atema dang asütsü, ibaji asen taküm nungi piladoktsü. Bilemdangang asen taküm nung takok anguba anogotem aser oset aser süoshi tasen anguba mapangtem, item tepela ajakji kenlirbo samadoker. Aji oda, tatidang aser tetoktepbpa mapa ka nung kenü asenok takok angutsübaji tepelatsüka asütsü mesüra kibong akümba anogojia asenok asoshi tepelatiba anogo asütsüa akok mesüra süoshi mesüra gari tasen ka aliba anogotemji tepelatsüka asütsü saka itemji alima tepela dang, anungji mapang tatsüka tsüngda nung samadoktsü. Ajisüaka, asenok dak aliba tepelabaji Yisu Khrista dak aliba nungi anguba tepela süra ibajibo asenok dak nungi kecha tashi agia bener moutettsü. Tenyar Paul ya par mapang Rome yimli nung yimten nung tashi akaba nisung ka liasü. Pa dak yimten tashi tuluka liasü, anungji pai iba tashiji amshia pa mulungsüa Khristan purtem reshikangshi. Pa temulung meyiper külena pa tepuokdak ayu, pa long agi tera agidang onsetsa mesüdaktsüi kümzük. Paul-i alima yimten tashi aser taginüba nungi anguba tepela dak amang nungbo, pai kodanga Yisu Khrista-ji pa taküm nung kibur aser kümtetdakba ta magizükla. Ajisüaka, pai alima yimten tashi aser rongsen nungi anguba tepela ajak toktsür Yisu Khristai agütsüba tepela dang agizük. Aji oda, iba tepela jagibo pa tepuokdak reshikangshia aliyonga, yimten yimsüsürtemi pa merenshiyonga aser nübertemi pa dak long agi aonyonga pa kodanga medoktsü. Iba jagi Filipi 4:11 nung pai ashi, " kechi tia nung ni lidir liaka, idakji ni temulung süa alitsü ni angazükogo,:" Alima rongsen aser aseni tanü aginüa bilemba aser nüksibatem masü saka Paul, shibai pa taküm tia ajak nung pelaa alitsü angazük, ajiang taginütsüka lir. Iba ama teti pelaa alitsü tashiji Yisu Khrista nungi angur. Paul dak aliba tepelabaji pa alidak ki, kiyong, mopong mesüra nisungtem ajungba agi pelaba tepela masü saka Yisu Khrista den tesendaktep shitak ayuba nungi anguba tepela liasü. Asenoki aiben asenok mepelatetbaji tsüraburtemi tanurtem dak atonger, tanurtemi tsüraburtem dak atonger mesüra asenoki pi dak atonger, ajisüaka ibaji asenoki nisungtem dak nungi tepela angutsü imlaa bushiba ajanga lir. Tenyar Paul dak aliba tepelaji asenok dak lira, pai ashiba ama, tia ajak nung asenokia Kibuba dak pelaa litettsü. Yisu Khrista dak amangba ajanga asenoki anguba tepelaba agi teti asenoki Tsüngrem tenüng sanga litettsü. Taküm nung pelaa alibaji Tsüngrem dak tamang shitak yutetba tamaitüsü lir. Aiben asenoki Tsüngrem dak mamangtetter, anungji tenüngsanga magütsütetter, iba jagi asenok mepelar. Ajisüaka, kodang asenoki Tsüngremi asenok nem nungdak ajak moatsübatem repringteta Pa nem tenüngsang agütsüdir, iba jagi Tsüngrem den asenok tesendaktep junga yutetter aser tepela angur. Atangji, Tsüngrem dang asenok nungdak ajak meshitsübaji tim, kechiyong Paji tagütsüsang, saka aiben asenoki asen nungdak ngur külen tenüngsang agütsütsü amadoker. Ajisüaka, asenoki metettsüba kaji tenüngsang agütsüba nungi tepela angur. Tsüngremi moatsüba ajak asoshi Pa nem tenüngsang agüja pelaa alitsübaji tamanger shia asoshi teinyaktsü tongtibang mapa ka kümdaktsüsüla. Pelaa aliba molungjang nung tenükmerem aser tamajung bilemba temeneni mapa meinyaktetter.

OLEMSABANG

NAGA NUNGERI PEI SASA MANGATET TASHI YIJI AJEMTSÜ

~ M.Meren Ex.Pastor Ungma

Asen tsürabur putuji yi ajemba putu liasü, saka parnok yi agi jemseta asüba kodanga matalok,ano yi agi mesepa jemer yiar o jembia kima yimtung nung ajemejua (ajaki menüja) senzüba kata maliasü. Saka kodang Naga nunger State angu iba mapang nungi tenzüka tuluria ajem, tilaria ajem, yimtaklir tulu tila ajaki yiji ajem. Nagaland State mangu tashi nungbo Arogoi yi ajemertem kanga meranga nokdanga aru aser kari ajemba Arogoi putetra sentep mapang nung Tenla kidang nokdaka tatok mebidakja aru anungji tamanger rongnung yi ajemer kata maliasü. Saka kodang State angu iba mapang nungi tenzüka tongtibangsa Minister aser MLA –tem yim semdanga arudang yimdaklir yimsüsürtem nem yi parcel parcel ajungzüka agüja aru, anungji State nguli nungi tuluri anir tilar tashi aser Arogo kar nungbo Arogo tenzükeria ajemer ta jembia aru aser aji 1990 tashi talubusa ajem, anungji atura nisung aika jemseta asü.

Iba mapang nungjibo süoshi tajung sobur saksü agi temang ajak belongbanger mashi nung merepdaka aliba ajurua aruogo, anungji Nagaland nung NBCC, ABAM aser Arogo lenirtem longjemer Nagaland nungyiyameshibangra Naga lima mekaka, ta süoki ia jembir Sorkar dang yi shibangang ta mapang talangka ayimtena aruba Naga lima lenirtemi kanga shisadanger hau aji shidak ta angateta Nagaland nung yi mamshiba State akümer ta 1990 nung sangdongogo.

Iba yi tongpang akokba sülen küm ka ana yi jemnürtemi mimshia jema aru, saka oda oda Nagaland nung ochimashir jentisa jenti poktet, oda temaba menden nungi tenzüker yimtsüng kinük kisang ajak nung OCHIMASHIRJI poktet aser Nagaland ajunga nung loktiliba benjung tulu-tila ajak nung yimjak nung otia yi ji anganüa jemtepa aru.

Ibaji ajanga Nagaland nung oda arishi küm 30-40 tsüngta alirtem yi agi jemseta asübaji noklang nung 80% aser tanga tashidak agi asübabo 20% dang alitsü südi. Yi mamshiba State-bo sangdong, saka kinük-kisang ajak nung yi mangudak maka aküm. Aser item ajak tamakokji asenoki NBCC, ABAM aser Arogotem dak atonger. Saka NBCC dak atongtsü kecha mali, ABAM dak atongtsü kecha mali aser Arogoi kecha mainyakba ajanga ajemer ta atongtsü kecha mali aser yimtsüng nung yimsüsürtemi ozüng mamshiteter ta aitsütsü kecha mali, kechiaser yimtsüng kar nungbo yimsüsürtemi tayokertembo yimtsüng nungia aridoka mintokogo. Ano asenoki police majungba agi ta tenüng tesendak lir, hau item ajakji tashi mait alitsü akok, saka NBCC, ABAM aser Arogotem nung ola adokbaji tanga mapang kecha nunga ola maka saka kodang State Sorkari yi lapokdi ta ayimoktsür idangji dang ola adoker ta ashitsü akok. Saka oda ashirdang ashi Arogoa, Mungdangtema aser Sorkar tenzükertema parnok jia mapang ajak nung yi dakji dang rangloker alitsüba masü, saka pei pei department teinyaktsü anogoshia meinyakma maparen tulu agi neneter aliba tesa lir. Saka item ajak taiji tajemertemji lir, parnok dangji tebang ajak kazüka yi tejem ta ashiyonga ajemtsüsa, parnok dangji ner pur medemer ajak sümar anungji mesünüra melenshiangja ta ashiyonga tajemeri pei pur asübaji kecha sükschia mali, pei kinungtsür aiatai tia nung okrongbaji kecha hau ta sükschia mali, pei chirtem pur medemer dang aksetba agi kecha lokti nunga medenli ta atsüngzüka akümbaji kecha sükschia mali. Saka pa yi angur mangur ta ibaji dang tongtibangba.

Anungji yi shibangba ozüngji agina adok yonga tajungba masütsü aser aki ama kasa ozüngji akayonga tajungba masütsü, saka alima tsüngdangbo yi ozüng aginatokbaji maksü tulu Khristan State kati inyaktetogo ta alimai Khrista maru tashi jembitsü aser nisungtembo tang jemseta asüba dang nungi ter anaben agi timba jemsettsü ta yamaji Nagaland tia ajurutsü. Yi lapokra idangjibo yi tajung ajemtsü anungji jemseta asür malitsü ta bilemer asü? Aser yi tajungbajibo kotak nung recognized asüba yi na? Aser jemseta asüdang adianutemi pa yipden nung alidang Khrista agizüker kotaki ogo ta lokti dang ayimoktsür, ajibo temenünütsü o lir, pai pa sasa tepset nung kodaser kotaki aotsü, tajemertemji yipden nung kotaki aotsü asoshi Tsüngremi lenmang lapoktsütsü ta bilemer asü? Nisung tepseter kodanga kotak yimli nung senmang maka, ano jemsetasa masüyonga temang atema ishishi ajemer, kümdanga temai madoki ajemertem nisung tajung aikasa lir, parnok jagi Tsüngrem mapa tulu inyaker, tenla tulu agütsür aser temeim mapa inyaker ta yamaji lir, saka itemjia yi ajem tashi nungbo kotak yimli nung shilem makasa. Gal 5:21 züngdangang.

Aser Khristan State ka nung yi shibangba ozüng aginadokdangji Chief Ministerji shiba liasü, NBCC Secrataryji shiba liasü aser ABAM Executive Secy-ji shiba liasü ta alimai toteta jembitsü.

Saka Asen Naga nungertem ochi metettsübaji ano mapang talangka agitsü aser item ajak dangji ochiba sayutsübaji Arogo tenzükertem dang lir, saka item jagiang Arogo rongsen timba mimzüka agir aka nungshibai tamajunger dang sayutsüngitsü? Laishiba nung yimtung nung ochi laoa lir ta zülua alibaji yimtung nung masü saka tanübo AROGO nung laoa lir, anungji mezünbuba nung Tsüngrem tenzükertem shidakba Tsüngrem tenzüker nung dang alima dangi ochibaji shilangtsü.

Anungji yangi tangatetba ana agütsür, Nagaland nung yi ajemertem ni tanü nungi yi endokdi ta pai/lai mulungtet nung dang Naga lima nüchiba dangi shilangtsü aser Tsüngrem tenzükertem dang tanü tashi nungbo sayutsüngir adoka mali anungji pei sasa ni shidakba Tsüngrem tenzüker ta mulungtet nung dang Naga lima melenshitsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Khristai tenyaba wadang inyaktsüji ajak khuret: Dr. Michael Oh



September 28, 2024 nü South Korea kübok Incheon yimti nung 'Fourth Lausanne Congress on World Evangelization' tatembangbuba sentong nung Lausanne Movement CEO, Dr. Michael Oh-i okila jembidang tangokba noksa nung angur.

September 28, 2024: September 28, 2024 nü South Korea kübok Incheon yimti nung 'Fourth Lausanne Congress on World Evangelization' tatembangbuba sentong nung jembidang Lausanne Movement nung CEO, Dr. Michael Oh-i, Khristai tenyaba wadang inyaktsüji ajak teinyaktsü khuret lir, ta metetdaksü.

Lausanne 4 tatembangbuba sentong nung jembidang Dr Oh-i Khristantem dang, Khristai tenyaba wadangi kü teinyaktsü mapa masü ta mashitsüla, kechiyong iba ya Arogo teinyaktsü khuret aser ajak teinyaktsü khuret lir, ta ashi.

"Tenyaba wadang tulutibaji ajak teinyaktsü khuret lir. Khristantemi peipei aliba tesem nung dang inyakba ajanga küm ka nungi küm ka süia aodangbo alima nung Khrista osangtajung mangashidangertem teimba-teimba dang kümdar," ta pai ashi.

Dr Oh-i, "Khristantemi nukjidong yur amalitepa meinyakra ibaji ajanga nisung billion aikati Khrista osangtajung kodanga mangashidangtsü," ta ashi.

Khrista osangtajung proktsü atema Khristantem aikati melungteta loktiliba balala nung

tenyaba wadang inyaktsüla, ta pai ayongzük.

"Tang alima nung nütsüng billion 3.4 bo Khrista osangtajung mangashidangba telok 7,400 rongnung densema lir, aser parnok süadokba mapang tashi nunga parnoki Yisu indang osangtajung mangashidangtsüsa lir. Alima nung Muslim nungertem, Buddhist aser Hindu nungertem ajak senteper shilem 86-ibo Khristan ka danga memetet. Iba ya missionary tem aser pastor tem teinyaktsü khuret dang masü saka artists, engineers, kaketshirtem, professors, CFOs, CEOs aser tangar aika teinyaktsü khuret lir," ta pai ashi.

Paisa, "Künü anogo nungbo Tsüngrem tsüngdang nokdaker asenok kodamesüi akümtsü aser asenoki mapa nung tamakok anguba atema kuli meshitetsü," ta ashi.

Anogo tenentnü tashi (September 22-28) Lausanne 4 sentong agiba mapang nung Khristan lenirtemi Khristai tenyaba wadang longjemer inyaktsü atema jembia aruogo. Tatembangbuba anogo nung shilem agirtem dang longjemer Khrista osangtajung proktsü atema 'Collaborative Action Commitment' nung sign südakja liasü.

Dr Oh-i, "Khristan shingaia, ni tangar menüngdaksü ta meshitet. Tsüngrem nüburtemi temeim mapa inyakba dang masü saka amalitepa Yisu Khrista nung temang ka südaksür inyak nungbo ibaji ajanga wadang tulu komaka inyaktetla?" ta asüingdang.

Tatembangbuba sentong nungsa America nung pastor aser kaketzülur Rick Warren-i arrshi küm 40 ser tekübokpurtem dang, "Wadang renema inyaktsü aser tenyaba wadang renemtsü atema nenok dak tashi lir," ta ashi.

"Ajisüaka alizüing atongtsü atema tesayurtem, partners aser medemertem nüngdaker," ta pai ashi.

Pai arrshi küm 40 ser temapurtem dang khen nokdakang, ta ashiba sülen pai arrshi küm 40 ser tekübokpurten dang, "Item nisungtem dang nungi nenok angazüktsüla. Nenoki tasüngdangba shidak metetra nai nisung mashie ka dang nungi angazüktsü. Tazünger ajakji tangazükertem lir. Parnok küm aika tenzükba wadang nung inyaka arudar, anungji nenoki parnok dang nungi angazüktsüsa aika lir," ta metetdaksü.

Paisa, "Item telok anapronglai wadang renema inyaktsü atema ni

sarasademtsür," ta ashi.

Lausanne 4 sentong nungji linük 200 dak tema nungi Khristan 5,000 shi aden. Alima nung Khristai tenyaba wadang longjemer inyaktsü atema parnoki o lemtepa aruogo.

O lemtepa sülen ang 'Seoul Statement' renemtsüla, ajisüaka jelia tapak 20 document (Seoul Statement) sangdongba ajanga mangatettep adok aser Lausanne Congress senden nung shilem agirtem aikati mepelai liasü, kechiyong parnoki anogo tenentnü tashi onük balala nung o lemtepa aruba sülen ang 'Seoul Statement' ji renemtsüla liasü.

Iba dak sendakba nung Lausanne otongdar, Michael du Toit-i email ajanga shilem agirtem dang Seoul Statement dak sendakba nung telangzüba meshiogo.

"Seoul Statement sangdongba mapang nung onoki iba nukjidong tejangja metetdaksüba tajungba sülen, koba ajanga shilem agirtemi iba dak sendakba nung tebilemba balala lemsatepteter lila," ta pai metetdaksü.

Seoul Statement dak sendakba nung telangzüba agütsübatemji Theology Working Group-i agizükba sülen parnoki Lausanne lenirtem den telemtetba agia inyaktsü.

Iba ama mangatettep aliba mapang nung osangbenertem den jembidang Lausanne board of directors nungi Chris Wright-i, "Iba movement-i iba ya Khristantem ajak tebilemba o lir ta mashir," ta metetdaksüba ajanga-a mangatettep adok.

Anogo tenentnü tashi South Korea yimtiba, Seoul yimti tezülen Incheon yimti nung aliba Songdo Convensia nung

Lausanne 4 senden nung alima nung mission mapa, Khristan lenisüba, yimtitem nung mission, climate change aser Khristantem reshikangshiba onük densema kanga tongtibang onük aika nung o lemtepa aruogo.

Lausanne Congress senden ya Lausanne Movement küm 50 ajungba mapang den külemi repsema agiogo.

Küm 50 tejaklen (1974) kanga nüngtugu sayutsüingir

asür Billy Graham, John Stott aser Evangelical lenirtem aika Lausanne, Switzerland nung adenshia senden amenba sülen parnoki mission nung rangloker Lausanne Movement ya tenzüka liasü.

Bodhbarnü Lousanne Movement küm 50 ajungba sentong tetenzük nung jembidang Dr Michael Oh-i, Arogoi digital ajanga alima den sendakteptsüla, yamaji mesüra tarutsü nung kecha mesütetsü, ta metetdakja liasü.

Lausanne 4 omenji 'Let the Church Declare and Display Christ Together' liasü aser iba sentong takok angutsü atema Korea nung aliba Arogo noklang aikati nungita yariba den külemi Korea nung Khristan meyirjang aikati hopta piyong sarasademja aruogo.

Ajisüaka Khristan karibo Lausanne 4 sentong anema longkak aita liasü. Lausanne Congress-i alima nung tetsür o tetsür na medemba mesüra tebur o tebur na shi nung medemba anema ola madokteter, ta tai tonglokja Khristan kari longkak ait.

September 22, 2024 anogo nungi tenzükba September 28 tashi Fourth Lausanne Congress ayongzüka kaogo.

Tanü alima nung litsü shilem 40 dak temabo tang tashi Khrista osangtajung agi mayimjem, saka tang alima nung Khristan missionary 4,50,000 nungi missionary shilem 97 bo Khrista osangtajung agi ayimjemer aliba tesemtem nung ang lir, ta Lausanne Congress report ka ajanga metetdakja liasü.

Tang alima tesem balalai Khristan missionary teimtiba yokba linükji United States lir, iba dak alia Brazil, South Korea, Philippines aser Nigeria linüktemi missionary aika alima tesem balalai yoker.

Taküm küm tetenzüklen Lausanne Movement-i State of the Great Commission Report ya jelia sangdonga liasü.

Lausanne Congress nung Khristan lenirtemi alima tesem ajaklen Khrista osangtajung proktsü atema atemzükter longjemer amalitepa inyaktsü bangjemogo.

ANOGO ABEN TSÜNGREM DEN

TSÜNGREM METSÜBUBA TESAMA

Ananiai item o angashidang, pa alanga lao aser asü, ya angashir ajak madak tetsübu tulu adok. T. Mapa 5:5

Aseni amangba Tsüngrem ya ochi aser temeshi. Pa dak amangbapurtem ajak Pai melaba ozüing benschia taso shia takok aser temoatsü den senmang tajung bener lidaktsünür. Saka meimchir aika tangatetba shisatsü makaba ajanga takoksa aser tansütsü nung taküm tempanger. Iba lai nung kibong ka kinungbo aser kinungtsü na dak aoksa-a tasüba ajuru aser ibaji shisa makaba mapa koba Tsüngrem metsübuba ajanga ataloka liasü. Rongsen nung ochi mashibajia temenen tulu ta iba tatalokba ajanga tali jangjar.

Meimchiri aiben aibelena Tsüngrem jashidaktsübaji, Tsüngremi moatsüba mezüingdang aser aibelena kütdang asüba ajanga Tsüngrem mulung machir aser teinyaktsü aika tabensaba nung meinyakteter. Temoatsü ajak Tsüngrem nungi ta meshisadangi pei sasa angu ama bilemba agi rongsen ajanga aiben mangatettep, mepelatep, lendong aser tesama ajurur. Khristan ka ama, ali rongsen koba lenmang nungi bener arur? koma kütdang asür? shisadangi. Tsüngremi asen kütdangtsüba teti repringdar ta bilema atakatem masü temoatsü jazüka rongsen kütdang asütsü merangdi.

AO OSHI ANGAZÜKDAK: TANÜ ANGAZÜKTSÜBA OJANG



Tanglok

(v) süngjang tangtettsüsa akümba, mashisa aküm (fruition, impregnated)

* Atsü nung süngjang tanglokba mapang la dak tanur tanglok.

Tangmo

(n) süngdong nung tejep tejep atangba tasen jang (sumac)

* Tangmo yagi aon nung mim samatsür.

OLONG PAITEP # 6938

1				2				3		4
5		6								
							7			
8										
										9
		10					11			
				12				13		
14										
							15			
16										

TIPIEN

- 2. Auonungchiyongsüasenba
- 5. Mangyimba mapang
- 7. O tamendakdak
- 8. Peidak malangba
- 10. Juli
- 12. Sen ayudak
- 14. Tenük agi ajitet
- 15. Tamajung aküm
- 16. Apuso

LANGTSÜNGLEN

- 1. Lenmang
- 2. Aor kidong ka tenüng
- 3. Tenarong maten
- 4. A _ _ _ g
- 6. Mopung apodoka
- 9. Tongtipang tagitsü
- 10. Menungra bilem
- 11. Aiür
- 13. S _ _ _ k
- 14. T _ _ _ r

OLONG PAITEP # 6937 TELANGZÜBA

TIPIEN :

- 1. Lemsä, 3. Osang, 5. Mezüng,
- 6. Agi, 7. Süra, 8. Tebutem,
- 9. Amen, 12. Odi, 13. Asayar,
- 14. Angsü, 15. Agima.

LANGTSÜNGLEN :

- 1. Lamén, 2. Sangken, 3. Omen,
- 4. Asüküm, 7. Sendong, 8. Tejang,
- 10. Tanga, 11. Tazü.

NAI-A YA METETTER MA



Illinois, USA nung arishi küm 27 tain Sabrina Dausman ket nung Squishmallows teimtiba bendena lir.

Mascoutah nung alir Sabrina-i Squishmallows kanga meimer aser lai tang tashi nung 1,523 bendena lir aser iba atema Guinness World Records nguogo.

Squishmallows ya 2017 küm Kelly Toys Holdings LLC ajanga saya aser kiburji Berkshire Hathaway company-Jazwares lir.

Manipur Naga tsürtemi checkpoints agientsü akhanger

Imphal, September 28, 2024

(Agencies): Naga Women's Union (NWU)-i Centre aser state sorkartem dang Manipur nung highways aser roadways nung ozüngi memelaba checkpoints, gates & barriers agientsü mepishiogo.

Manipur nung central aser state security forces-i mita aoba maparen inyakba mapang ka NWU-i iba takhangba agütsüogo.

Manipur ketsdangtsürtemi NH-37 aser NH-2 nung essential supplies belenba nung yaritepa arur saka ozüngi memelaba checkpoints ajanga public kanga timtemer ta NWU-i ashi.

Gari lenmang nung bunkers yangluba aser tenokdangatem ayuba ya senso temeten anema lir aser onoki timtem ajurur, tashiyim agi sen meshir aser telungpur teloktemi amokmerener ta parnokisa ashi.

NWU-isa central aser state forces-i telungpurtem den anasatepa aliba atema tebilemstü abenba metetdaksüogo.

Central aser state forces-i mapa timi inyaktsüla aser Manipur nung tekaratiba nung yimjung bener arutsü atema yariteptsü mepishir ta NWU-isa ashi.

PELABA LEMSATEPER



RONGSENTOSHI AO
Asü - 24th Sept 2024

Onoki teti meima aliba Obala, Pa manemi aliba mapang nungi tasünü tashi nung shirnokisa ozü khuret ajak nung rongsen, nübu, shisatsü, sarasadem aser lenmang balala ajanga yaritepogo, nenok ajak dang kanga pelaba lemsateper.

Tsüngremi nenok ajak moajang ma.

~ Temeim kinungsü, Chirnur, Semchir, Kinungertem aser Anükapang.

Assam sorkari recruitment exam atema mobile internet shibanger

Guwahati, September 28, 2024

(Agencies): Assam sorkari September 29, 2024 nü state ajungalen mobile internet aser data services khen atema shibangtsü metetdaksüogo.

Deobarnep 8:30 ako nungi nikongdang 4:30 ako tashi shibangtsü ta Additional Chief Secretary Ajay Tewari-i ashi.

Class III government posts atema state-level written examination nung ashikülakba aser tim masüba inyaktsü akok ta bilemba agi sorkari iba lemtet agi.

"Tatidang agütsür aika aser technology tim mesüi amshitsü

akok anungji sorkari mobile internet shibangtsü nüngdak ta angateter" ta Tewari-i ashi.

Internet services shibangba ajanga mobile applications aser online resources amshiba noktangtsü ta sorkari bilemer.

Iba tatidang atema candidate lakh 7.3 tema lir aser shilem ana- Bachelor's Degree level posts aser HSLC (Driver) posts lemsar agitsü.

Assam State School Education Board (ASSEB)-i testing agency ama inyaker aser examination centers 822 nung agitsü.

Assam sorkari mobile

internet khen atema shibangtsü saka fixed telephone lines ajanga voice calls aser broadband connectivity alitsü.

Iba lemtet ajanga sorkar mapa nung nisungtem shimokba mapa tashishitsü melii inyaktetsü ta nisung kari sorkar nem tenüngsang agütsüogo. Ajisüaka ano karibo businesses aser communication nung tetsükdaksü ajurutsü ta shiogo.

September 15, 2024 nunga state sorkari Grade III posts written examination agidang ghonda 3 atema mobile internet services shibanga liasü.

Model HSS Kohima-i Battle of Bands for School kokogo



Kohima, September 28 (TYO): Model Higher Secondary School Kohima tenüng nung Gears 4-i "Battle of the Bands for Schools" takok nguogo.

Iba sentong ya Department of Youth Resources & Sports-i Youth Festival nung shilem ka ama ayongzüka liasü.

Iba tetoktepba ya RCEMPA Jotsoma Kohima nung agi, kong battle of band for schools final nung school 10-i shilem agia liasü.

Holy Cross HSS Dimapur nungi Crossians aser Bethesda HSS Dimapur nungi Escapism

na tanabuba aser tasembuba jenjang nung liasü.

Consolation prize pongu ya The Vineyard School Kohima nungi Genesis, Patkai HSS Chumoukedima nungi PHSS, GHSS Longleng nungi Bauhang, St John HSS nungi The Redeemers aser Loyola HSS Kiphire nungi Euphonic Design nunger nem agüja liasü.

Brehostibarnü IG Stadium nung Youth Festival amungba mapang tetoktepba balala indang result tem:

Folk Song: 1st - Tuensang, 2nd-Shamator, 3rd- Kiphire

Folk Dance: 1st - Mokokchung, 2nd - Peren, 3rd - Mon

Science Mela: 1st - Zunheboto, 2nd - Mokokchung, 3rd - Wokha

Declamation: 1st - Peren, 2nd - Tuensang, 3rd - Wokha

Painting: 1st - Phek, 2nd - Niuland, 3rd - Zunheboto.

Youth Festival shibangba sentong nung NPP MLA Dr Tsielhoutuo Rhutso-i YRS Secretary Anthony Ngullie aser YRS Director Kethosituo Sekhose na den külemi takok angurtem nem sempet tem agüja liasü.

Pakistan: Punjab sorkari section 144 benokogo

Rawalpindi, Rongjui/ September 28 (Agencies): Punjab sorkari Rawalpindi district nung anogo ana atema Section 144 benokogo. Pakistan Tehreek-e-Insaf-i lokti senden ka ayongzüka agitsü sentong yanglur aliba magi tsüngda iba jenjang ya agiogo, ta Liaquat Bagh, ARY News sangdong ka ajanga metetdaksü.

Rawalpindi nung PTI-i lokti senden ka ayongzüka magi tsüngda anogo ka lia Section 144 benokba sangdongogo.

CrPC kübok section 144 dak ajemdaker osang agütsüba nung district administration-i, lokti senden, rally, longkak aitba sentong aser hadir balala sayaba ajak tenokdangba agütsüogo. Iba tenokdangba ya September 28 aser 29 atema agütsüogo, ta ARY News-isa metetdaksü.

Code of Criminal

Procedure indang Section 144 ya mapang tatakzük ka atema nüburtem adenshiba nokdangtsü asoshi kanga bulua amshiba legal provision ka lir.

Section 144 of CrPC ya Attock, Jhelum, aser Chakwal districts tem nung benokogo.

Kasa mapang nung PTI-i parnok pusemertem dang Liaquat Bagh nung ajuruteptsü ayongzüko.

National Assembly nung Opposition lenir Omar Ayub-i X ajanga, "Liaquat Bagh nung 2 ako nung nenok aika adenshitsu mepeshir. Asenok telongjem ka agitsü aser iba ya asenok legal aser constitutional temeden lir," ta ashi.

PTI-i Rawalpindi nung September 28 nü rally agitsü atema deputy commissioner indang office dang temelaba meshia liasü, saka mapang tatsüka lir agin.

Temetetsü kaji Justice

Chaudhry Abdul Aziz tekolak sür Lahore High Court indang Rawalpindi bench-i ashiba agi, parnoki Honibarnü rally ka ayongzüka agitsü atema temelaba meshiba aginogo.




Justice Chaudhry-i "nenoki temepishiba benokba sülen aginer.. Asüng ya Rawalpindi nung nenok indang rally agitsü südi?" ta asüngdang

Obendangeri asüngdangba dak sendakba nung PTI okatsüri ashiba agi, party-i Rawalpindi nung rally agitsü atema anogo asem tejakdang benoka liasü, ajisüaka tanüang ken o angadang.

PTI okatsürisa, deputy commissioner-i iba ken o ya atsülanga bener aoer, ta ashi. Anungji PTI-i lenirtem tetuyuba dak ajemdaker temepeshiba agitsü telemetba agiogo, ta ashiba Geo News sangdong ka ajanga metetdaksü.



Hamas aser Israel na rara khen atema Israel aser Lebanon na rara kümogo, kechiyong Israeli Defense Forces-i anung ajanga Hezbollah pur tamendakdak balala maka arudar. Israel-i ashiba agi, Hezbollah tekolakba Hassan Nasrallah joko alima joko ojang dang amokmerentsü kechiyong pa yashi Beirut amakba mapang tepsetogo ta ashi. Israel-i agütsüba osang ya shitak süra iba ya Hezbollah atema kanga takoksa tulu asütsü.

Aaj Se Thoda Kam



Anogo shia chijemba nung temo, metsü aser shini ajema achiba ajanga temulungjang tashidak, hypertension aser diabetes amala memenatempa tashidaktem nokdangtsü teyari agütsür.



Diet nung metsü ajema achitsüba lenmang kar

Sorchiokba mapang dough (chapatis / pooris atema) aser chi nung metsü minoktsü merangang.

Metsü melena spices, herbs, condiments, lemon, tamarind pulp amala traditional ingredients tem amshiang.

Sambar mix, pav bhaji mix amala commercial spice mixes tem ajema amshiang, kechiyong item nung metsü aika lir.

Sorchiokba mapang metsü aon tamentsü anasa inokang kechiyong iba ajanga metsü ajema amshiyonga chiyongtsü nangdaksür.

Metsü aliba butter, lon, pickle, papad, ketchup ama ajema achitsü merangang

Portion sizes nungi cut down sodium-i azüokang

For any grievances mail us at: foodsafety@nagalandhelpline@gmail.com

State Food Safety Authority,
Department of Health and Family Welfare, Govt. of Nagaland.

US-i Iran nung ISIL anema operation anentsü

Washington , Rongjui/ September 28 (Agencies): United States aser Iraq nati külem sangdong ka ajanga ashiba agi, Iraq nung ISIL (ISIS) den raratsü atema US-i aniba telok ya 2025 küm tatem tashi dang inyaksangshitsü, saka US nunger sepaitembo matsüngintsü atema lenmang sadema lapoka yuogo.

Hokolbarnü külem sangdong ajanga, Iraq nung US nunger sepaitem tarutsü koma asütsü iba indang osang tejangja magütsü, saka ketdangsurtemi ashiba agi, tang iba jenjang agiba ya sepaitem atsüngintsüba masü saka temelenshi mapangang ka asütsü.

US tir Joe Biden indang administration nungi ketdangsur tejen kati ashiba agi, iba inyakyim ya shilem ana küma lemsar inyaka tembangtsü.

Mezüngbuba shilem ya 2025 küm September ita tashi nung tembangtsü imlar, kong linük anati mulungtepba ama Iraq nung tesem kari nungi coalition ta ketdangsurte ashi.

Tanabuba shilem nung US sepaitem 2026 küm tashi Syria nung anti-ISIS coalition inyakyim nongita yaritsü atema Iraq nung maparen kar nung maneni inyaksangshitsü.

US-Iraq defence tesendaktep ya coalition ka nungi US-Iraqi bilateral security relationship ka akümtsü, ta ketdangsurtemi ashi. Ajisüaka US nunger sepaitem ajunga atsüngintsü asü masü iba indang osang tejangja magütsü.

Alima ajunga kiralongrar den rara nung shilem ka ama US-i mezüng 2003 küm Iraq amak.

2001 küm September ita tatalokba sülen US-i Iraq amak aser 2007 tashi nung sepai 170,000 tashi yoka liasü.

Washington-i US nunger sepaitem timba 2011 küm tashi nungbo Iraq nungi aninogo.

Ajisüaka US tir Barack Obama indang administration-i 2014 küm sepaitem yokshi, kechiyong ISIL puri Iraq aser Syria nung tesem aika atsünga liasü.

ISIL pur maneni inyaksangshidar, ajisüaka Iraq nung parnok-i azüoker aliba tatembangbuba tesem 2017 küm aser Syria nung 2019 küm atsüngogo.

Iba sülen 2021 küm Biden administration-i Iraq nung US "combat mission" tembangtsü aser linük nung US sepai 2,500 shi shilem ya advisor shilem-i melenja liasü.

Maneni sepaitem ano tajemba kümdaktsütsü atema January ita nungi sensaksem tenzüko kong Iraq Ato Kilonser Mohammed Shia al-Sudani aser Iraqi armed forces aser US-i aniba coalition nungi tongtibang ketdangsurtem densema lir.

Iraq nung US nunger sepaitem maneni inyaksangshiba ya Sudani asoshi yimden yimsüsüba nung minprong ka kümogo, kechiyong iba ya tongtibang nisung aikati anema arudar.

US sepaitem anenzüka aliba base tem küm aika Iran den sendaktepa aliba telungpur teloktemi maka arudar.

Israel-i Gaza amak tenzüka sülen item base tem ya aiben maka liasü, ajisüaka tangbo kanga agi tajemba kümogo.

NSF Trophy: Circle FC & Tangkhul Katamnao na QF-i iogo



Kohima, Rongjui/September 28 (TYO): Angami Students' Union-i ayongzüka tang Indira Gandhi Stadium Kohima nung asaya aliba NSF martyrs' memorial trophy nung Honibarnü Circle Football Club Chedema aser Tangkhul Katamnao Saklong nati asaya koka quarter final-i iogo.

Round of 16 nung asaya tenetbuba asayaba mapang Circle FC Chedema-i goal 2 agi Khrietho FC Meriema koka liasü. Asaya nung goal anaprongla ya Joseph-i minute 26 aser 41 nung idakja liasü. Iba asaya atema Man of the match naroküm ya Circle FC nungi Kennedy Lalboi Kuki nem

taoba ASU executive Ako Zhasa-i agüja liasü.

Tatembangbuba Pre-quarter final asaya nung Tangkhul Katamnao Saklong (TKS)-i goal 6-0 agi Tribal Stallions FC kokogo.

Asaya nung mezüngbuba goal ya Ramchan Shatsang-i minute 8buba nung idaktsü aser Aimso Chithung-i minute 13buba anung tanabuba goal idakja liasü. Paisa, minute 59 aser 64buba nung goal ana idakja hat-trick ka agütsü. Maneni Machimmi Kashung aser Worchupei Kashung natia minute 75 aser 89buba nung goal koka idakja liasü.

Aimso Chithung nem man of

the match naroküm, taoba mapang Naga Students' Federation Speaker Gentleson Vashum-i agüja liasü.

Kasa mapang nung asayamung nung shilem ka ama Deobarnü 12 ako nungi tenzüka exhibition championship 'Clash of the Stars' ka asayatsü ta metetdaksüogo.

Team temji ASU XI, ASU Seniors FC, AYO XI aser NSF XI alitsü.

Mezügbuba asaya ASU XI aser NSF XI na 12 ako nung asayatsü aser tanabuba asaya AYO XI aser ASU Seniors na 1 ako nungi asayatsü.

Asaya ana nung takoker 3 ako nungi final asayatsü.

Cosmo Malaysian Open Darts Championship nung Naga nunger 6 asayadar

Dimapur, Rongjui/September 28 (TYO): Cosmo Malaysian Open Darts Championship 2024 (MO24) nung Naga nunger darts asaya 6-i shilem agidar. Iba asayamung ya MALAYSIA DARTS ASSOCIATION (MDA)-i ayongzüba lir aser Kaula Lumpur nung September 27 nü tenzükogo aser 29 nü tashi asayatsü. Naga nunger dart asayartem tang mezüngbuba

international tetoktepa ka nung shilem agidar.

Naga nunger darts asayartemi iba asayamung nung shilem agiba ajanga tarutsü atema lenmang lapoktsütsü, tesendaktep yanglutsü aser lanur asayartem international jenjang nung shilem agidaksütettsü.

MO24 ya MDA indang proprietary event ka lir, koba alima nung asayar tajungtibatem

sabang ka nung anidentsü nükjidong nung ayongzüka asayar.

Local aser international Darts fraternity-i MO24 event ya tokteptsü langa aliba tetoktepa ka ama agizüker. Iba asayamung ajanga alima tesem balala nungi asayartem nem parnok wangshitsü atema sabang agütsüba dang masü senpeta telongjunga agütsür.

Argentina goalkeeper Martinez nem asaya 2 atema tenokdangba agütsü



Emiliano Martinez

Rongjui/September 28, 2024 (Agencies): Argentina goalkeeper Emiliano "Dibu" Martinez nem FIFA indang disciplinary committee-i, fair play inyakyimtem anema inyaksangshiba atema asaya ana atema tenokdangba agütsüogo.

Pa Argentina pur Venezuela aser Bolivia den World Cup qualifiers asayatsü aliba nung masayatetsü.

Iba ita tetenzüklen Chile aser Colombia na den Copa America asayaba mapang Martinez-i FIFA indang code of conduct

anema inyaksangshia liasü. Chile den asaya akokba sülen goalkeeper yagi Copa America trophy indang replica ka pa indang groin area nung ama liasü, koba 2022 FIFA World Cup koker benjungba mapang kasaji pai inyaka liasü.

September 10 nü Argentina-i goal 2-1 agi Colombia makokba asaya nung Aston Villa goalkeeper yagi tatembangbuba whistle apuba sülen camera operator ka indang hadirtem nongtokja liasü.

Argentine Football Federation (AFA)-i ashiba agi,

FIFA-i iba tenokdangba magütsü tsüngda asayar aser federation iba inyakyim indang kuli agütsüogo.

"Fair play indang inyakyim anema inyaksangshiba aser yimyayimpong shidak mebenshiba atema Damian Emiliano Martinez merenshiogo," ta AFA-i sangdong ka ajanga metetdaksü.

"Temetettsü kaji FIFA disciplinary committee-i iba telemtepa agiba ya Argentine Football Association-i khenyongi magizükba lemsatepogo," ta AFA-isa metetdaksü.

La Albiceleste pur tang Conmebol World Cup qualifying rankings nung temaba jenjang nung lir. Parnoki asaya ti asayaba sülen point 18 ngua lir aser parnok tanabuba jenjang nung aliba Colombia dang nungi point ana agi timba lir.

Conmebol nungi temaba jenjang nung tembangba team trok 2026 World Cup atema indang indanga qualify asütsü aser jenjang tenetbuba nung tembangba team inter-confederation playoff ka nung shilem agütsü aser takok ngura qualify asütsü.

West Indies nunger asayar Bravo asaya nungi anenogo

Rongjui/September 28, 2024 (Agencies): Taoba mapang West Indies nunger all-rounder Dwayne Bravo cricket asaya format ajak nungi anenogo. Pa indang career nung tatembangbuba season groin yiruba ajanga minprongba sülen pa tang asaya nungi anenogo.

Arishi küm 40 tain asaya shiba T20 asaya nung wicket timtiba agiba asayar lir, pa tang asaya aliba Caribbean Premier League campaign tembangba sülen asaya nungi anentsü atema sentong yanglur liasü.

Ajisüaka pa groin yiruba sülen Trinbago Knight Riders asayar yagi asaya nungi anenadaoktsü atema telemtepa agiogo.

"Kü mulungibo maneni asayaner, saka kü shi temang agi joko tashiba aser raksarabong balala ya mekokteter," ta Bravo-i Instagram nung post ka ajanga metetdaksü.

"Ni kü team-mates, kü fan tem mesüra ni asayaba team ni meshidakba ajanga tamakok majangshidaksüner.

"Anungji temulung kanga korema ni iba asaya nung anenba osang sangdonger. Tanü champion-i nenok den salem lemsateper," ta pai ashi.

Bravo ya tebur cricket asayartem rongnung T20 asaya ajak nung wicket 600 dak tema agiba mezüngbuba asayar aküm aser pai ajak senteper wicket 631 agiba sülen asaya nungi anener. Pa indang average 24.40 runs aser economy ji 8.26 per over lir.

Pai, Chennai Super Kings nungi asayaba mapang Indian Premier League title asem benogo aser West Indies team nungi asayaba mapang T20 World Cup ana tashi kokogo. IPL nung pa ya wicket (183) timtiba agiba asayartem rongnung tasembuba nung lir.

Bravo shiba West Indies team nungi Test asaya 40 aser one-day internationals 164 asayaba sülen 2021 küm international cricket asaya nungi anena liasü, pa IPL champions Kolkata Knight Riders indang mentor shilem agütsü.

WADA-i Jannik Sinner nem tenokdangba agütsütsü akhang

Rongjui/September 28, 2024 (Agencies): World Anti-Doping Agency (WADA)-i Honibarnü Court of Arbitration for Sport dang tennis asaya nung world number one asayar Jannik Sinner nem steroid ken o nung tenokdangba agütsütsü mepeshia asüngdangogo.

"WADA-i pa nem küm ka mesüra küm ana tenokdangba agütsüsdaksüner," ta parnoki sangdong ka ajanga metetdaksü.

Italy nunger asayar ya tenokdangba agütsür aliba substance; clostebol amshiba March ita anaben tashi puteta liasü, saka pa asaya asoshi temelaba agüja liasü.

Arishi küm 23 tain Sinner shibai tawa US Open koka Grand Slam anabuba benogo pa tang Beijing nung asayadar aser pai tenokdangba agütsür aliba mozü achiba menangzüki arudar.

Taoba ita International Tennis Integrity Agency (ITIA)-i ashiba agi, season tetenzüklen anaben tashi positive puteta sülen Sinner aibelenali mali ta sangdonga liasü.

ITIA-i pai ken o rasa ashiba agizüka liasü. Pai ashiba agi iba mozü ya pa indang physiotherapist-i pa temang ranger aliba ka anepaluba mapang spray ka amshiba aser iba sülen pa nem massage aser sports therapy agütsüba sülen pa temangi ia liasü.

WADA-i ashiba agi, parnoki CAS nem Brehostibarnü



Jannik Sinner

temepeshiba ka agütsüogo.

Clostebol ya anabolic agent ka lir aser WADA-i tenokdangba agütsür lir.

US Open akokba sülen Sinner-i ashiba agi, pa tetendangba tamakok anguba indang ken o ya pa mulung nungi metugui liasü.

US Open final nung pai Taylor Fritz straight set nung koka liasü. Paisa January ita Australia Open-a koker liasü.

"Iba ken o kü mulung nungi metugu liasü. ken o amatok ta masü saka ni court telungi aiba sülenko ni asaya dak rangloker asayatsü meranger aser tensa takokba tashi tajungtiba azüoktsü meranger," ta world number one asayar yagi ashi.

"Temela masü saka ni asaya dak rangloker asayatsü merang aser ni junga inyakteter ama bilemer," ta paisa shisem.

Italy nunger asayar nem taitok agütsüba atema asayartem karibo ashishiogo aser ashiba agi, iba asaya nung pa jenjang dak ajemdaker pa nem tangar dang nungi balaka maongka talila agütsüogo.

BILEMDANGANG

"Azüzüka inyakba ajanga lendong nungi jenbor."